

Kalaallit Nunaani kræftimik eqqugaasunut sungiusaqqittarfimmik pilersitsinissamut siunnerfilinnik iliuusissanik pilersaarusiornissaanik Naalakkersuisut kingusinnerpaamik UPA2016-imi peqquneqarnissaanik siunnersuut.
(Inatsisartuni ilaasortaq Agathe Fontain, Inuit Ataqatigiit)

Akissuteqaat

(Peqqissutsimut Naalakkersuisoq Doris Jakobsen)

Aappassaaneerneqarnera

Naalakkersuisut siunnersuusiortumut siunnersuummut qujanaq aammalu Ilaqutariinnut Peqqissutsimullu Ataatsimiititaliamut siunnersuummut isumaliutissiissutigineqartumut sukumiisumik suliarisimaneranut qujavunga.

Naalakkersuisut piginnaangorsaqqiineq immikkut eqqumaffigisimavaat. ”Inunnut toqussutaasinnaasumik napparsimasunut suliniuteqarneq piginnaangorsaqqiiniarluni nipaallisaaniarlunilu (nipaallisaalluni iliuuseqarneq) periarfissat”-ni Naalakkersuisut UKA 2015-mi agguanneqartoq katsorsaanerunngitsumik nipaallissaanerup aamma piginnaangorsaqqiinnermut ataqatigiinnerat ersersinneqarpoq. Siusissukkut napparsimanerni nappaammillu qaangiigaanni piginnaangorsaqqiineq qitiuvoq, nipaallisaanerli inuunerup naggataani salliusarluni. Nassuiaatip innersuussutigaa najukkami suliniutit innuttaasunut toqussutaasunik nappaatilinnut suliniutit nukittorsarneqarnissaat aammalu piartortut najugaqarfissaanik pilersitsisoqarnissaa, pissutigalugu peqqinnissaqarfiup misilittagarimmagu innuttaasut toqussutaasinnaasumik napparsimasut sapinngisamik angerlarsimaffimmi qanittuani katsorsartinneqarnissaminik paarineqarnissaminillu kissaatigimmassuk.

“Livsrøm” illuliaapput “illuliassanik ajorunnaarsitsisunik” tunngaveqartunik pingaartumik kræftimik eqqugaasunut, tassani naapissinnaallutik siunnersortinneqarsinnaallutillu, sungiusarlutik, suliaritereerermiluunniit qasuersarlutik. Danmarkimi arfineq marlunnik “Livsrøm-eqarpoq”, tamarmik kræftimut immikkoortortaqarfinnut qanittumiillutik. Danmarkimi “Livsrøm” pisortanit aningaasalersorneqanngilaq, kisianni Kræftens Bekæmpelse-mit Real Dania-millu ataatsimoorlutik sananeqarlutik, pissutigalugu RealDania sanaartornermi aningaasartuutit ilai isumagimmatigit. Neriuffik, Kræftens bekæmpelse aamma Real Dania 2015-6-imi nalunaarusiorput “Nunatsinni Livsrøm”.

Ataatsimiititaliap isumaliutissiissutaanni Naalakkersuisunut piumasaqarput nassuiaasseqqullugit “Livsrøm” aningaasalersornissaanut Naalakkersuisut ataatsimoorlutik qanoq peqataatigisimanersut ilisimatinneqarsimanersulluunniit. Neriuffik Peqqissutsimullu Naalakkersuisoqarfik kingullermik ataatsimiippat december 2015-imi, tassani isumaqatigiissutigineqarpoq Neriuffik suleqatissamik, taama ittunik atortorissaarutininik

assingusunik pisariaqartitsisunik ujarlernini ingerlateqqissagaa, ataavartumillu Peqqissutsimut Naalakkersuisoqarfik ilisimatinneqartassasoq.

Naalakkersuisunut pingaaruteqarpoq erseqqissassallugu piginnaangorsaqqiinnermut neqeroorut innuttaasunut toqussutaasinnaasumik napparsimasunut neqeroorutaasariaqarnera, ass. innuttaasut uummalluttut, tartuluttut imaluunniit pualuttut sianiutigullu nappaatit. Nunatsinni Livsrummi innersuussivoq, kræftimik eqqugaasut ikimmata, "Livsrum" kræftimik eqqugaanikunut allatigullu toqussutaasinnaasumik nappaatilinnut atuutissasoq.

Ilaqutariinnermut Peqqissutsimullu Ataatsimiititaliap isumaqatigiillutik kissaatigisimavaat, Nuummi piginnaangorsaqqiiffimmik kræftimut eqqugaasimasunut pilersitsisoqarnissaanik suliaq ingerlaannassasoq allannguutissatullu siunnersuummik nassiussilluni:

**Nunatsinni siunnersuisarfimmik sungiusaqqittarfimmillu pilersitsinissamut
periarfissanik misissueqqullugit Naalakkersuisut peqquneqarnissaat.
Aningaasalersuinissaq pilersitsinissarlu eqqarsaatigalugit aningaasaateqarfiit,
kommunit aningaasalersuisinnaasulluunniit allat avataaneersut
aningaasalersueqataasinnaanerat qulakkeerniarlugu sulissuteqartoqassaaq. Suliaq
pillugu nassuiaammik UKA 2016-imi saqqummiussisoqassaaq.**

Naalakkersuisut inassutigaat allannguutissatut siunnersuut akuersissutigineqassasoq.